

दास भाव

तहरीर
माधव दास



तरतीब
गिरधारी लाल
(दास मजलूम)



दासु भाव

तहरीर
माधव दास

तरतीब
गिरधारी लाल
(दास मज़लूम)



The Avant Garde

494, Sector 31, Faridabad - 03 (Haryana)

Ph. 0129-3092654, 011-35389196,

email: avantgarde1@indiatimes.com

सॉरी हकूक तरतीबकारु सुंदि नावु मँहफूज़

किताबि हुंद नाव : दासु भाव

भक्ति कवि : 'माधव दास'

(दोयुम बोग)

कवि : गिरधारी लाल

'दास मज़लूम'

कम्प्यूटर मॉहिर : रिकू कौल (9419136369)

नागरी लिपि : पृथ्वी नाथ कौल 'सायिल'

म्वल : Rs 25.00

किताब मेलनुक पताहः

1. अमर कालोनी, तालाब तिलू,
कैम्प रोड़, जम्मू। Ph. : 2503767
2. IILS, D.T.P Centre, Muthi Jammu.
Ph. : 94191-36369
3. Rohit Dass (Dhar), 494, Sec-31,
Faridabad, Haryana
Ph. : 3092654



माधव दास

अर्पण

पनुनिस हैतिस, भगवानु भैखत्य
तुं कला पूजार्थ्य सुंघन
चरणुकमलन
येम्य् पनुनि बरादेरी हुंद उचर
दौहय कोंछ।

‘दास मजलूम’

बोग - 1

ग्वडु कथ

सतुच साधना

मन श्वदि तस यस शोज़ आसि भावना,
 क्षणु क्षणु करि युस श्वज़रुच कामना
 तस छे मनु कामना पूर्ण सपदान
 श्वदि मनु करि युस पज़रुच साधना

‘सायिल’

म्योन यि चु पोद छु येमि स्वदाम चरिथुकिस
 भक्ति कवि स्व० माधव दास जी सुंजि भावनायि,
 पज़रुचि पुछि पजि साधनायि, धर्म कर्मचि प्रेरणायि,
 रुति स्वभावुच चेनुवन दिवान। कलाकार येलि पनुन्य
 कला अनतःकरणव सृत्य पूज़ान छु, अदु छु सु
 नामावॉरी प्रॉविथ लूकन हुंद टोठ बनान। कला रँछरावन्य,
 पनुन पान गुहन तु ग्रँज रँस्य लूख छि तसुंज कलाकृती
 वुछनस दरमांदु आसान। तिहुंद सु येछि तु मायि तसुंज
 कलायि हुंद हज तुलुनुय छे तँमिसुंज कामयाँबी,
 तिमुय पँज्य कलाकार छि वाँस दर वाँस तु पुयि पतु
 पुयि मंज श्वहरथ प्रावान तु ज़ांह ति छिनु मँशरावन
 यिवान।

यिथिवुय कलाकारव मंजु छु अख प्रजलवुन
 नाव 'माधव' दासुन ति। माधव दास छु बिजाँती
 माधव जुव दर। दास छेनु कांह जाथ। यि ति छे मँज्य
 बनेमुच। दपान येलि माधव दर सारकँय मुलॉज्यमत
 करनुकिस सिलसिलस मंजु गरा महकमा मालस मंजु,
 गरा तॉलीमी महकमस तु गरा कसटम मँहकमस मंजु
 नौकरी करान ओस। सु ओस चरि ख्वतु चँरिस वक्तस
 जेम्य सोबस मंजुय रूदमुत। येति ओस यि आम
 र्यवाजा जि नावस सुत्य ऑस्य् यजतु बापथ दास
 जोरान। अदु अँमिस ति गव माधव दास, माधव दास
 दँरिथ। बहरहाल ओस यि दास वनुनु किन्य् व्वन्य्
 जलजल लबनु यिवान।

कथ छि स्यठाह प्रॉन्य् मगर पनुनि खास अँहमियँच
 किन्य् छे द्वहँ ख्वतु द्वहँ यि दँप्पुजि ति नवान साँदुरवार
 बासान। तिक्याजि थेटर ओसमुत ओस तिमन द्वहन
 यिहय बदलय तु यिछ तिछ हिश कथ कथा। बँल्य्कि
 ऑस्य् अथ समाजस मंजु नीच नजरी वुछान। यिमन
 ऑस्य गिंदन गँर्य तु रासु कठ हिव्य बदनाव।

नेत्रस पाँत्रस मंजु ति ऑसुख रुकावट यिवान तु
 यि ओसुख अख कृ पद (नौक्स) मानुनु यिवान। अमा
 पोजु यिमन अमि कलायि हुंद जोश, शौक तु वलवलु
 आसान छु तिम छि पनुन बोल बजा अनुनु तु समाजस

मंज बेखबर तु बे जौक इन्सानन हुंद नज़रयि बदलावुन
तु यिछि हिशि तंग नज़रि क्यो रस्मे बदस सुत्य
मुकाबलु करुन, पनुन फर्ज जानान। तिम द्रायि तु
कँरुख कशमीर थेटरिकल कम्पनी कौयिम। यूवसु
कँशीरि मंज ग्वडनिच थेटर कम्पनी ऑस। सामाज
सुधारु खॉतर ऑस्यु यिम सबक तु नसीहच बँरिथ
नाटक गिंदान। बड्यन त्योहारन प्यठ ऑस्य धार्मिक
नाटक हावान। देश भँखती मुतलिक, रस्मे बदन प्यठ
नन्नज तु हज़लु सान ड्रामा हॉव्यु हॉव्यु लूकन हुंद दिल
रंजुनावनस सुत्य सुत्य तिमन रुचि वति पकनुच चेनुवन
दिवान। तु अमि कम्पनी लौब वारु वारु समाजस मंज
व्यकार। अथ थेटरिकल कम्पनी सुत्य ऑस्यु वारयाह
कलाकार तु फनकार वाबस्तु। कँह नाव ऑस्यु यिमः—
स्व. वेदलाल वकील, स्व. शम्भू नाथ कौल, स्व.
काशीनाथ भान, स्व. माधव दास, स्व. सुदामा जी
कौल, स्व. शम्भू नाथ ओगरा, स्व. शाम लाल
लाबरू, (रंगरू) स्व. कृष्ण जुव भान, स्व. राधा कृष्ण
बर्बुजू। बेयि ति वारयाह। कथि हुंद मकसद छु स्व.
माधव दास जियुन अथ कम्पनी मंज हावुन लायक तु
थ्यकुन लायक हिसु न्युन।

अदाकौरी तु फनकौरी सुत्य सुत्य छे यिहंज
शॉयरी ति मॉयमंज तु लुकन प्रेयिवुन्य तु सनुवुन्य।

यिहुंज तखलीक स्वदाम चरिथ (काँशुर मंजूम नाटक
छु लूकन वुनि फिरुन)। मे छु बासान स्व० शम्भू नाथ
कौलन छु अथ पनुनि मोदरि हटि गोविथ जिंदगी तु
अबदी मेछर बखुशमुत। स्व क्वसु काँशिर बटन्यु या
बटु कँर्यज्यन यस नु यि भजन च्यतस छुः—

स्वदामुन्य त्रय वनान तस स्वदामस तँय।
गछतो अस्तु वनतु भगवानस॥
प्रोन मैत्रु भाव चोन सुत्य कृष्णस तँय,
बोजिना सु करिहे व्यपदा दूर॥
असि क्याह लजा छा तस मंगनस तँय,
गछतो अस्तु वनतु भगवानस॥

या

लेजि मंज कनि नाट्य लॉगिम पाकस तँय,
यी वुछिथ शुर्य म्याँन्यु क्याह गछन ख्वश।
द्यद दियि बतु असि नेन्द्र पैयि मस तँय,
गछतो अस्तु वनतु भगवानस॥

(स्वदामा येलि कृष्णस मील्लिथ वापस गरु आव —
अति ओस भगवाणन अूमिस खाँतरु मँहलखानु बनाव
नोवमुत — सु छु वदान पनुनी पनु पॉर कोत गँयम—)

ओस कस रूजिथ अँदरी वॉर,
कँम्य नियि प्रॉटिथ म्याँन्यु पनु पॉर।

म्वरलीदरु सुंद छुम यी खॉर,
कॅम्यु नियि प्रॉटिथ म्यॉन्यु पनु पॉर॥

बहरहाल यि छु सोरुय मुकमल नाटक। भक्ति भावुक्य छि तॅम्यु बेशुमार भजन लीख्यमुत्य। दीवताहन तु दीवयन हुंज आराधनायि, लीलायि तु व्यनच ति लेछिमचु। दपान 1981 ई० मंज लोग यिहंदिस मकानस नार। येमि किन्यु अँहुंज वारयाह तखलीकी कॉम ज़ायि गॅयि। शिव शंकर सुंजु त्वतायि, गणेश अस्तुतियि, राम तु कृष्ण लीलायि। मीरा बाई हुंज कृष्ण भक्ती ति छन पनुनि आयि काँशरि शॉयरी मंज तखलीक कॅमुच।

बहरहाल ओस माधव दास अदाकार ति तु तखलीक कार ति। कला ऑस अँहंदिस गरस मंज प्रथान तु फाँफजार लबान। गरुँक गरय ओस कला मंदर बन्योमुत ति ज़न गव शुर्य ति पलेयि अँथ्य वातावरणस मंज।

कश्मीर थेटरिकल कम्पनी ति गॅयि पतु कला केंद्र नावु दोह ख्वतु दोह काड़ कड़ान तु पोछर लबान। कॅशीरि हुंघ नामवार अदाकार तु कलाकार रूद्य अथ अदारस मंज तरबियत लबान। माधव दासुन ज़्युठ नेचुव स्व. त्रिलोक दास (पापा जी) गव फिलमन मंज ति कॉम करनि, तु पतु रूद दुस वाँसि अथ्य कलायि पूज़ान। तु कला केंद्रस मंज नॅव्यु नॅव्यु कलाकार

खति कड़ान तु तिमन अथु रँट्य रँट्य हैछिनावान।
 ब्याख नेचुव गिरधारी लाल दास ति रूद बराबर अथ
 सुत्य ग्वडु प्यठय वाबस्तु। ग्यवुन, गिंदुन, अदाकाँरी
 तु व्वन्य शॉयरी करान। पनुनिस कलाकार मॉल्य् सुंघ
 कलाकार शुर्य रूद्य पनुनिस मॉल्य् सुंजि हाविमचि
 वति प्यठ पॅकिथ तरकी करान। यिमव नेशिनोव मॉल्य्सुंद
 नाव। बरादॅरी हुंदि उचरु तु ह्यतु खॉतरु खूल यिमव
 एम॰दास पब्लिक स्कूल। युस पनुनि नॅव्य्यँच हुंद ला
 मिसाल अदारु बन्यव। कॅशीरि प्यठ जोम यिथ छु यि
 अदारु येति ति स्यठा मश्हूर तु मोरूफ। अमि सुत्य ति
 हॉव यिमव शुर्यव पनुनिस मॉल्य् सुंज श्रद्धा। माधव
 दास जीनि कॅह तखलीकु छे यथ किताबि मंज
 शॉमिल तु अंदस प्यठ छिस गिरधारी लाल 'दासु
 मज़लूम' सुंघ कॅह भजन बेतरि ति।

मे छे आश जि किताब अथस मंज रँटिथ पेयि
 असि पनुन्य् काँशिर परम्परा ति याद तु साँन्य् तिम
 चुक्यदर कलाकार ति यिमव साँनिस समाजस पनुन
 म्वलुल द्युत पेशकश थोव।

पृथ्वी नाथ कौल 'सायिल'

पटोली, जम्मू।

धन्यवाद

मेत्र गव सुय युस “स्वखने” (जेवि सुत्य याने कथि तु रायि दायि सुत्स), “कदमे” (साथ दिथ तु नखु फ्योक बॅनिथ) तु “दिरमे” (पाँसु टुंकि दॅस्य, हाजथ रवाँयी कूरिथ) अथ रोट करि। त्युथ ह्युव कांह पुरुष या स्त्री छे धन्य आसान।

बु छुस पनुन्यून रुत कांछन वाल्यून मेत्रन हुंद धन्यवाद करुन यछान यिमव मे यि किताब छाप कॅरिथ पनुन्य पितृ रयण नखु वालनस मंज कुनिनतु कुनि रंगु सहायता कॅर:

श्री मोता लाल क्यमू साँबन हाँव मे वथ तु नेक मशवरु दितिख, तिहुंद धन्यवाद करुन छु म्योन फर्ज बनान।

श्री मोहन लाल ‘आश’ साँब रूद्य मे यि काँम करनु खाँतरु पतय। तिमन ह्यकुनु हूरिथ।

श्री पृथ्वी नाथ कौल ‘सायिल’ साँबन दिच मे येमि किताबि हुंज नागरी लिपि शवद्ध कॅरिथ तु बाँय सुंद्य पाँठ्य अथ किताँबी शकल सूरत दिथ बेयि अमिच ग्वडुकथ लीखिथ अँकिस सँही हमदर्दु सुंद सोबूथ। बु छुस तिमन ति धन्यवाद करान।

पनुनि धर्म पत्नी श्रीमती विजनती दर (दास) ति
छुस बु धन्यवाद करान, यिमव ज़न मे नखु फ्योक
लॉगिथ यि किताब कडुनस मंज़ कॉफी मद्द कोर।

तु ऑखरस प्यठ सारिनुय आय कांछान। तिमन
सारिनुय बंधन बांधुवन तु मैत्रन हुंद ति शुकुरियि करुन
छु लॉज़िमी यिम यथ किताबि हुंदि खॉतरु मे बांद बांद
ऑस्य् करान। दय थॅव्यनख वारु वति म्याँन्य् छख
यॅहय ऑही। स्वफल गॅछ्यनख।

ॐ शांति

दास मज़लूम

त्रै चु पॅघ्

1. सेतार साजस सुर गछि आसुन,
सुर कडि ज्ञाननवोल ।
ग्वर सुंजि ओंज्ञन्यायि ब्रंद गछि मारुन,
अदु नेरि सुर शूबिदार ।
साजस सुत्यन सुर तु ताल मिलुनाव,
जेनख चु मनुकुय भाव ॥
2. मन येलि जेनख डंजि तेलि रोज़ख,
वुछख चु रामु अवतार, तेलि क्याह गाटु छुय
अपोर तरनस, चु तारुहख बैयि सुत्य कृत्य ।
ओंमय व्वपुकार जगत तरे 'माधव' स्वरे राम ।
3. दिलि ओंयीनस खय येलि कासख,
बासी चु नूरुयनूर,
सुर च्यन तारन वुठ युथ नॅ रोज़ी,
गेली सोरुय समसार ।
'माधव' मनस दुय येलि कासख,
दॅय चु भखशी सबूर ।

ॐ गणीशाये नमः

गणपता तिछ वथ मे हाव तम,
 पूजुहथ युथ राथ तु द्यन।
 कर मे पूरन ही निरनजन॥
 पूजुहथ युथ राथ तु द्यन॥०॥

होल गोमुत लोलु चान्युक,
 लोल सुय गॅनिरावतम।
 मीढ्य दिमुहय पादि कमलन॥
 पूजुहथ युथ राथ तु द्यन॥०॥

दूरि रूजिथ सूद क्या छुम,
 बोद असलुक हावतम।
 सूर गछ्छयम पापन तु शापन॥
 पूजुहथ युथ राथ तु द्यन॥०॥

प्रारु कोताह दूरि दूरे,
 नीर नीर व्वन्य् रोज़तम।
 गोश थावतम लोलु नादन॥
 पूजुहथ युथ राथ तु द्यन॥०॥

येलिय बोज़ख सोज़ म्योनुय,
 तेलि गछि मरनुन मु छयेन।
 कलपुनायन कामुनायन॥
 पूज़ुहथ युथ राथ तु द्यन॥०॥

छुस ओदम बैयि त्रेशु होत बो,
 केशुवुन चान्युन गवणन।
 वर दार खार म्याँन् खाम पन॥
 पूज़ुहथ युथ राथ तु द्यन॥०॥

छेट तु खोट म्याँनी क्रैया छय,
 गोट मै कासतम छुख चु दय।
 वासुनायन करतु मैय छ्यन॥
 पूज़ुहथ युथ राथ तु द्यन॥०॥

दास 'माधवस' छुख चु स्वामी,
 छम मु खॉमी कासतम।
 भवु बन्दुनय करतु व्वन् यु छ्यन॥
 पूज़ुहथ युथ राथ तु द्यन॥०॥

सुदामा चरित्र

गच्छतो अस्तु वनतु भगवानसः—

स्वदामस येलि अयाल अगादि गव। सु ओस स्यठा दरिद्र। तँम्य् ह्योक नु गृहस्त पॉलिथ तमि किन्य् ओस व्याकुल रोज्ञान, मगर धर्मस तु कर्मस ओस नु पॅत्य् यिवान। ऑखर छु दय सोरुय ज्ञानान तु पनुन्यन भॅखत्यन हुंद ध्यान थावान। कृष्णु भगवान ओस स्वदामस मैत्र। सु ओस राज्ञु। व्वन्य् हैतिन यिमन गृह्द्य श्वदुन्य् तु सोशीलायि प्यव ज्वन तु वोनुन स्वदामस :—

1. ग्रेहद्यन येलि आव बल सोरनस तँय,
सोशीलायि हंगु मंगु ज्यव फोरान।
सोशीला लॅज वनुनि तस स्वदामस तँय॥
गच्छतो अस्तु वनतु भगवानस॥०॥
2. प्रोन मैत्रु भाव चोन सुत्य कृष्णस तँय,
बोजिना सु करिहे व्यपदा दूर।
असि क्याह लज्जा छा तस मंगुनस तँय॥
गच्छतो अस्तु वनतु भगवानस॥०॥

3. न्यथुनैन्य शुर्य छिम वनु बो कस तँय,
 दरिद्र भाव असि त्राव्याह ज़ांह।
 दोख वुछ वुछ छिम छ्वख बदनस तँय॥
 गछतो अस्तु वनतु भगवानस॥०॥
4. लेजि मंज कनि नॉट्य लॉगिम पाकस तँय,
 यी वुछिथ शुर्य म्याँन्य क्याह गछन ख्वश।
 द्यद दियि बतु असि नेन्द्र पेयि मस तँय॥
 गछतो अस्तु वनतु भगवानस॥०॥

स्वदामन वोनुस :—

5. स्वदामन दोपनस आसि युस पस तँय,
 प्रज़ुनावनस कति बॉय बंद तु यार।
 योत गछि तस तति दकु लगुनस तँय॥
 गछतो अस्तु वनतु भगवानस॥०॥
6. पँज्य पॉट्य मन छुम यछान गछुनस तँय,
 स्वदामा मनु पूज़ु वखनान छुय।
 ग्राव मा सु कर्यम प्रसादस तँय॥
 गछतो अस्तु वनतु भगवानस॥०॥
7. छरि अथु किथु पॉट्य बुथ बु हावस तँय,
 यी वँनिथ भक्ति ज़न म्वख्तु हारान।
 छुम क्याह निमु दिमु तस मैत्रस तँय॥
 गछतो अस्तु वनतु भगवानस॥०॥

8. लैयजु मंज कोम म्वठ तमि हॉवनस तॅय,
 दोपुनस स्वदामन गंडु कथ बो।
 यथ जन्दुस छम नु कुनि वथ मे गंडुनस तॅय॥
 गछतो अस्तु वनतु भगवानस॥०॥
9. जन्दु हुरि मंज बाग कोम गौंडनस तॅय,
 ति गॅन्डिथ स्वदामन ह्योत मार्ग।
 दॅछिन्य् किन्य् कन्या जंगि अँन्यिनस तॅय॥
 गछतो अस्तु वनतु भगवानस॥०॥
10. द्वारिकायि हुंद राजु नरदु गिन्दुनस तॅय,
 रुखमुनि नरदस गन्दिनावान।
 मनु किन्य् ओस सुत्य सुत्य यारस तॅय॥
 गछतो अस्तु वनतु भगवानस॥०॥
11. स्वदामा तॅसुंदुय नाव जपनस तॅय,
 तस रोस बेयि नु कॅह ज़ानान ओस।
 ही कृष्ण गोविंद छुस बु बेकस तॅय॥
 गछतो अस्तु वनतु भगवानस॥०॥
12. त्रयबोज़ किन ओस यॅच मन्दुछनस तॅय,
 कवु मंगु दनुदयार कर्म धर्म रोस।
 लानि हय आसिहम लगु मा बेछनस तॅय॥
 गछतो अस्तु वनतु भगवानस॥०॥

13. भँकितस भगवान सुत्य रोजनस तँय,
 युथ नु लगि दक् डोल स्वदामस।
 जंगलुक्य सुह तु शाल तस गोन्दुनस तँय॥
 गछतो अस्तु वनतु भगवानस॥०॥
14. मनु किन्य् लोग लीला परुनस तँय,
 केशव क्याजि छुख मे मँचुरावान।
 साकार रुपस ओस कृष्णनस तँय॥
 गछतो अस्तु वनतु भगवानस॥०॥
15. स्वदामा ओसुय मंज सोंचस तँय,
 क्याह सना बन्या मे कृष्ण दरबार।
 मन्दुछान स्वदामा वति पकूनस तँय॥
 गछतो अस्तु वनतु भगवानस॥०॥
16. थोकमुत तु लूसमुत लोग व्यचारस तँय,
 कवु आस कोत आस, छुम गछुन कोत।
 मेत्रस छुम गछुन सीर भावस तँय॥
 गछतो अस्तु वनतु भगवानस॥०॥

कृष्ण लीला

व्वन्य् येलि स्वदाम पनुनिस मेत्र भगवान कृष्णस निश
गछनस प्यठ तयार सपुद तु तॅम्य् हेच मनु किन्य्
भगवानस जॉरी तु आराधना करुन्य :-

ही कृष्णु बोज़ म्यॉन्य् ज़ार।
तार दिम मे तार दिम तार॥

छुम मे जिगरस नार,
नॅख्य छुम यॅच गोब बार।
वातु गाठ रोज़तम सार॥
तार दिम मे तार दिम तार॥०॥

रोज़तम मंज़ मने,
चेय रोस क्याह मे बने।
मूदमुत छुस मे बोठ खार॥
तार दिम मे तार दिम तार॥०॥

वोदरुच यँच छम फिकिर,
 रात द्यन यी छम जिकिर।
 फोटमुत छुस मै बोठ खार॥
 तार दिम मै तार दिम तार॥०॥

प्रलुयि किस गटुकारस,
 मुंह निस दँय यावस।
 अमि मंज बोठ मै खार॥
 तार दिम मै तार दिम तार॥०॥

मेय ह्युव ओन तु रोनुय,
 ज्ञानि क्याह जग तु प्रोनुय।
 ज्ञान दिथ रोजतम सार॥
 तार दिम मै तार दिम तार॥०॥

गोविन्द गोपालय,
 सिया राम श्यामु स्वंदरय।
 शंकर मुकुन्द अवतार दार॥
 तार दिम मै तार दिम तार॥०॥

ही शेवु क्याह गछि कम,
 कासतम मै मनुकुय गम।
 'माधव' छुय वनान जार॥
 तार दिम मै तार दिम तार॥०॥

रौव

पतु छु भँखती मगन गँछिथ व्यकारस यिवान तु नचनि
लगान लगान वनानः—

स्यद करतु मनि कामन,
रामु रोट मै चोन दामन।
मतु लाग तम मै पामन॥
रामु रोट मै चोन दामन॥०॥

वोलनस मायाये,
रोटनस कायाये।
द्वदुरिस अन्तु बामन॥
रामु रोट मै चोन दामन॥०॥

वाँतिथ पथ गछान बो,
अपजी बासान कोह।
जाँन्य जाँन्य छुस बु ब्रमन॥
रामु रोट मै चोन दामन॥०॥

अपज्युक छु संसारा,
 गाशस छु गटुकारा।
 चोन नाव वति लागन॥
 रामु रोट मै चोन दामन॥०॥

सोन कोताह यि सागर,
 तरु हा छुस बु लागर।
 क्यथु तरु दिम मै सुमरन॥
 रामु रोट मै चोन दामन॥०॥

करता छुख चु पानय,
 चुय रोस छुम बहानय।
‘माधव’ पानु वरतन॥
 रामु रोट मै चोन दामन॥०॥

रौव

गरि नीरिथ छु स्वदाम कृष्णु भगवान सुंद दर्शुन
करनुक्य् सौपुन वुछान तु पकान :-

गरि नीरिथ यॅच स्वदामा तोशनय ।
मनु किन्य् ओस पोश कृष्णस लागनय ॥

सॅच करान तय प्रॅच पानस त्रावनय,
ध्यान दारान पोश लागान यारुसुय ।
सोन तु व्वगुन कॅह नु वुछान लारनय ॥
मनु किन्य् ओस पोश कृष्णस लागनय ॥० ॥

म्वलु मॅल्य लोल कुनान द्यारनय,
भक्ति भावुक म्वख्तु ओसुय सारनय ।
पोश बासान लोल सुत्यन कंडिनुय ॥
मनु किन्य् ओस पोश कृष्णस लागनय ॥० ॥

कृष्णु सुमुरनि हुंद बो वनय कोताह बजर,
पख च्चु पकान पानु वुछख अम्युक थज़र ।
लोल कृष्ण ब्रोंठु यी चै लारनय ॥
मनु किन्य् ओस पोश कृष्णस लागनय ॥० ॥

हापतस आव लोल कृष्ण ड्येशनय,
 पाद ह्यथ लोग सुय स्वदामस फेशनय॥
 मायि किन्त् ओसुस कृष्ण बासनय॥
 मनु किन्त् ओस पोश कृष्णस लागनय॥०॥

सुह तु हापथ जंगुलस मंज आयि तस,
 ध्यानु भक्तिस लीन गौमुत्य सृत्य तस।
 अमि रुपु कँड्य स्वदामस सारुनय॥
 मनु किन्त् ओस पोश कृष्णस लागनय॥०॥

कृष्ण लोलुक क्याह वनय कोताह बजर,
 सागरस कोताह वनय क्याह छुस खजर।
 सुय तरि युस भक्ति भाव छारुनय॥
 मनु किन्त् ओस पोश कृष्णस लागनय॥०॥

छुय सुदामा जंगुलस मंज छौह दिवान,
 राजु जगतुक राजु रानि सृत्य रास गिन्दान।
 पानसुय सृत्य छुय स्वदामा गारुनय॥
 मनु किन्त् ओस पोश कृष्णस लागनय॥०॥

छुय स्वदर्शन चँकरसुय आलव दिवान,
 नेर ब्रोंठु यार म्योन छुय हा पकान।
 युथ नु डलि लागि छम्बन तु छारुनय॥
 मनु किन्त् ओस पोश कृष्णस लागनय॥०॥

द्वारिकायि पाय लॅग्य हिलुनय,
 ब्रोंठु द्रायि ग्रायि मारान मानुकी।
 छुय स्वदामा जल थल अंजुरावनय॥
 मनु किन्ऱ् ओस पोश कृष्णस लागनय॥०॥

दॅय प्रॅये वोत ब्रह्मन मँजिलस,
 प्रावुन यी ओसुय तस मनस।
 कश मँ कनस मन गछि मारुनय॥
 मनु किन्ऱ् ओस पोश कृष्णस लागनय॥०॥

कृष्णु कीर्तन सागरस छुय नावु तार,
 करु कीर्तन क्याजि छुख अपज्युक च़ु यार।
 करु कीर्तन कीर्तनुय छुय तारनुय॥
 मनु किन्ऱ् ओस पोश कृष्णस लागनय॥०॥

चारिरा तु फ्यारिरा स्वदामनुय,
 गटि मंजु गाश हावान रामनुय।
 पख च़ु अथ वति अदु च़लि रावुनय॥
 मनु किन्ऱ् ओस पोश कृष्णस लागनय॥०॥

दास 'माधव' छ्योट तु खोट योदवय च़ु छुख,
 रामु कीर्तन रामु वति हावी च़े म्वख।
 भक्ति भावय यवु तवु छुय तारनय॥
 मनु किन्ऱ् ओस पोश कृष्णस लागनय॥०॥

स्वदाम चरित्र

यिथु तिथु वोत स्वदामा कृष्णु भगवानु सुंजि डडि
प्यठः—

17. डेडि प्यठ वॉतिथ याद प्यव तस तॅय,
नाद किथु लायि तस बालुयारस।
कुस वन्य्म क्याह वनस छुस बेकस तॅय॥
गछतो अस्तु वनतु भगवानस॥०॥
18. डेडि प्यठ लोग अरु सरु करनस तॅय,
कुस वन्य्म कस वनु अँद्रिम कथ।
मंदुछान स्वदामा नोन वनुनस तॅय॥
गछतो अस्तु वनतु भगवानस॥०॥
19. पथ ब्रोंठ अँदय पॅख्य लोग वुछनस तॅय,
ऑसिथ ज्ञानुवान बन्योव अंजान।
चूरि चूरि चेनु ख्योन मोठमुत तस तॅय॥
गछतो अस्तु वनतु भगवानस॥०॥
20. आँचुरान डेडि वॉल्य् ऑसी तस तॅय,
क्याह सना ब्रह्मन छाँडान क्याह।
ऑर चरु किन्य् तिम पृछुनि लॅग्य् तस तॅय॥
गछतो अस्तु वनतु भगवानस॥०॥

21. गोरु बायि कति आख यथ तरफस तय,
 द्रेंठनु छुख यिवान थोकमुत छुख।
 चारु क्याह छु प्रालब्दु फल भूगनस तँय॥
 गछ्तो अस्तु वनतु भगवानस॥०॥
22. यारस म्याँनिस श्री कृष्णस तँय,
 वॅन्य तोस आमुत छुय बालयार।
 डेडि वॉन्य यि बूज़िथ खंदु कोरनस तँय॥
 गछ्तो अस्तु वनतु भगवानस॥०॥
23. स्वदामा लाचार सथ वननस तँय,
 सतु किन्य् वोननख छुस स्वदामा।
 मेलुनि आमुत छुस मैत्रस तँय॥
 गछ्तो अस्तु वनतु भगवानस॥०॥
25. कसू यारस तय कस बा मैत्रस तँय,
 मति गरि द्रामुत ओस स्वदामा।
 वुनि छय सुल गॅर गरु वातनस तँय॥
 गछ्तो अस्तु वनतु भगवानस॥०॥

द्वारुपालस व्यनति

स्वदामा छु आरुहोत डीड्य वॉनिस ज़ारु पारु करानः—

द्वारुपाल यीनय आर।

कृष्णस वनतु म्याँन्य् ज़ार॥

द्वारुपालु क्याज़ि ब्रम्योख,

अँस्य् अँस्य् क्याज़ि खम्योख।

संसार काँसि ना छु सार॥

कृष्णस वनतु म्याँन्य् ज़ार॥०॥

मतु वुछतु म्याँन्य् न जंदुन,

अवय छुख चु खंदु करन।

दोह ना छु रोज़ान सार॥

कृष्णस वनतु म्याँन्य् ज़ार॥०॥

ल्वकुचार छुम प्यवान याद,

मन छुम यँच गछान शाद।

नफचन बु कौरनस खार॥

कृष्णस वनतु म्याँन्य् ज़ार॥०॥

यिति ओस कर्म लोनुय,
 बूगुन ओस प्रोनुय।
 जलसुय छा लगान नार॥
 कृष्णस वनतु म्याँन्य् ज़ार॥०॥

जल ख्वतु ओसुस शुहुल,
 चनु फॅल्य् वॉजनम वुतल।
 सँदरस छा गंडान नार॥
 कृष्णस वनतु म्याँन्य् ज़ार॥०॥

पाठ शालुक छुम मैत्रा,
 गमखार छुम नु शेथरा।
 कर्म लॉन्य् कोरनस खार।
 कृष्णस वनतु म्याँन्य् ज़ार॥०॥

नय रोज़ि वन्दु र्यतुकोल,
 नय रोज़ि सोरमुत ओल।
 पथ रोज़ि अख व्वपुकार॥
 कृष्णस वनतु म्याँन्य् ज़ार॥०॥

दोह छिनु सॉर्य काँसि,
 रामु रामु पर तु वाँसि।
 नारस बनी गुलज़ार॥
 कृष्णस वनतु म्याँन्य् ज़ार॥०॥

इयेकि येलि पानु पूरे,
 ग्रेहद्यन बल सोरे।
 डीइय वानु कृष्ण नाव गार॥
 कृष्णस वनतु म्याँन्य् ज़ार॥०॥

नाव छुय सोम तु सोथुय,
 नाव छुय कर्म बोडुय।
 'माधव' दासु भाव प्राव॥
 कृष्णस वनतु म्याँन्य् ज़ार॥०॥

स्वदामा चरित्र

26. यि वॅनिथ स्वदामा आव होशस तॅय,
मनु तारि लोयुन यारस नाद।
कृष्णु आसन तति लोग हिलुनस तॅय॥
गछतो अस्तु वनतु भगवानस॥०॥

भगवानस आराधना

सनान सनान प्यव तस ज्वन तु तॅम्य लोय मैत्रस मनु
तारि नादः—

आगु म्याने नागु रादन प्यठ वुछुम चोनुय बहार,
सर्वु रागन त्याग करवुन नावु मंथुर चोन सार।
जाग ह्यमुना छुम राग चोनुय छुख च्चु म्योनुय ताजदार॥
आगु म्याने नागु रादन प्यठ वुछुम चोनुय बहार॥०॥

कोहॅ सारन आबुशारन प्यठ ग्यवान छी जानवार,
सबजारन मरगुजारन, गुलजारन युथ निखार।
मॅत्य छि गॉमुत्य् यी वुछिथ यूगी तु कम कम नामदार॥
आगु म्याने नागु रादन प्यठ वुछुम चोनुय बहार॥०॥

पोशनूलव सूर मोथमुत पोत वनन मंज दूर दूर,
 लोलु चान्युक नार ल्वलि ह्यथ पान मशरिथ छि बे सबूर।
 कर चु डेशन यी मनस छुख लोलु हँत्य छी बे करार॥
 आगु म्याने नागु रादन प्यठ वुछुम चोनुय बहार॥०॥

दीन छुस बो छुख दयालू आलुवा अख बोज म्योन,
 छुख दया सागर दयाये हुंद त्रावुम शुहुल पोन्यु।
 ध्यवु 'मधव' बनि अजामल हंगु मंगु लँगिय तस ति तार॥
 आगु म्याने नागु रादन प्यठ वुछुम चोनुय बहार॥०॥

लीला

दास छु प्रेरणा दिवान संसॉर्य मनशन जि पजि मनु
आलवन छु भगवान ज़रूर कन दारनः—

होशि मति पोशनूल वथ त्राव मुंह ज़्वोल,
गोविन्द गू पर चु गोविन्द गू।
सू हम सू पर चु सूहम सू पर॥
गोविन्द गू पर चु गोविन्द गू॥०॥

नेशकल न्यरमल वाति पानु गूकल,
सू हम सू पर चु सूहम सू पर॥
गोविन्द गू पर चु गोविन्द गू॥०॥

कुकिलि हुंघ पॉट्य सूरा मॅल्यथुय,
पोत वनुनुय रोज़ खट्यथुय पॉट्य।
टॉट्य तय अटॉट्य भव बन्दु चॅट्यथुय॥
गोविन्द गू पर चु गोविन्द गू॥०॥

काम क्रूध लूभ मोहँ निश रोज़ दूरय,
 मनुकामना अदु गछि पूरय।
 रामु रामु शामु शामु गवरी शंकर॥
 गोविन्द गू पर चु गोविन्द गू॥०॥

कावु सुंदि टावु टावु क्याह यी हॉसिल,
 कोलटूंच सुंदय पॉदय ज़ागी रोज़।
 आत्म गाड़ु वुछथुय डुंगु लाय सोदरस॥
 गोविन्द गू पर चु गोविन्द गू॥०॥

बालु भाव यावुन क्याह छु सब्ज़ारा,
 ज़न छु शालुमारा शोलु मारान।
 हरदुकि वावु अथ ज़रदी छि फेरान॥
 गोविन्द गू पर चु गोविन्द गू॥०॥

बब तु मॉज, बोय, बेनि, प्वफ तय मासय,
 भगवान लागान जुव जान वन्दुन।
 हरदुच ज़रदी काँसि नो त्रावान॥
 गोविन्द गू पर चु गोविन्द गू॥०॥

कुनि छुनु अरिरा कुनि छुनु दरिरा,
 कुनि छुनु स्यज़रा या पज़रा।
 यी वॅनिथ छुय वनान पानु दास 'माधव'॥
 गोविन्द गू पर चु गोविन्द गू॥०॥

स्वदामा चरित्र

मनु किन्यु लोयमुत आलव बूज कृष्णु भगवानन तु
अति आयि लोलु बानन छाव तु हवहराय वॅछ तु
द्रायि स्वदामस सॉरी बुथिः—

27. नाद येलि वोतुय आदि दीवस तॅय,
ग्रेहद्वयव चलनुक कोरहय संज।
तिछ दया करतु मै ति नादारस तॅय॥
गछतो अस्तु वनतु भगवानस॥०॥

28. त्रुय आयि दोरान निश कृष्णस तॅय,
स्वागतम करनुक कोरहय संज।
कृष्णु नाव तारान स्वदामस तॅय॥
गछतो अस्तु वनतु भगवानस॥०॥

29. चोरि पावि अख व्वठ यॅच गव मसतॅय,
पतु द्रायि लारान अष्ट स्यद तस।
ब्रोंठु प्रारान ओस यार यारस तॅय॥
गछतो अस्तु वनतु भगवानस॥०॥

30. गृहसतु धर्मु किस व्यचारस तँय,
 भगवान ओसुय वॅन्य् दिवान।
 पॅछिय पूजा छय आदि दीवस तँय॥
 गछतो अस्तु वनतु भगवानस॥०॥

31. ब्रोंठ नेर आमुत छु न्यरवासन तँय,
 आवा गवनस प्रोवुक छ्यन।
 सोदाम चैथ गछ सोदामस तँय॥
 गछतो अस्तु वनतु भगवानस॥०॥

32. चोरि पावि अख पोव यॅच गव मसतँय,
 पतु द्रायि लारान अष्टु स्यद तस।
 डेडि प्यठ यारस मीठ दितिनस तँय॥
 गछतो अस्तु वनतु भगवानस॥०॥

33. यि डींशिथ डेडि वॉल्य गॅयि बेहयस तँय,
 ज्ञानान छिनु भक्ति भावुक थान।
 ज्ञानुन तु मानुन प्रयमु ह्दयस तँय॥
 गछतो अस्तु वनतु भगवानस॥०॥

34. ख्वनि मंज ललवुख तु लोल बोरहस तँय,
 वातुनोवुख प्यठ देवान खान।
 पीताम्बर सुत्य मल छोलहस तँय॥
 गछतो अस्तु वनतु भगवानस॥०॥

35. भगवान यँच गव मंज हर्षस तँय,
 रॉनियन यिय वनान छुम यि बालुयास्।
 रॉनियव यि बूजिथ खंदु कोरहस तँय॥
 गछतो अस्तु वनतु भगवानस॥०॥

36. भगवान पृछान छुय स्वदामस तँय,
 गरु बार शुर्य बाँच छा वारय।
 जॉनिथ कृष्णन लोग बेह्यस तँय॥
 गछतो अस्तु वनतु भगवानस॥०॥

37. अंत्रयाँमी भगवान ओस तँय,
 गरि गरि बेयि बेयि ती पृछुहोस।
 ख्वश ओस यिवान आदि दीवस तँय॥
 गछतो अस्तु वनतु भगवानस॥०॥

38. स्वदामा छुस वनान यँच छि अँस्य मसतँय,
 क्याह वनय छम द्या काँचा चॉन्य ।
 जूव जान वन्दुहय संतोशस तँय ॥
 गछतो अस्तु वनतु भगवानस ॥० ॥

39. बालु पानुक श्रेह ओस कृष्णस तँय,
 खोर पानु छेल्यहस भावनायि सान ।
 रुखमनी आँसुस पोन्थ त्रावनस तँय ॥
 गछतो अस्तु वनतु भगवानस ॥० ॥

40. स्र्वणु आसन पॉरोवनुस तँय,
 क्याह वनय वोलासु क्याह वोल्नस ।
 ज़न ओस पॉरान महाराज़स तँय ॥
 गछतो अस्तु वनतु भगवानस ॥० ॥

41. कृष्णन पृछुगॉर यच कँरनस तँय,
 दोपनस प्रसाद क्याह ओनथम ।
 यि बूज़िथ स्वदामा गव बेह्यस तँय ॥
 गछतो अस्तु वनतु भगवानस ॥० ॥

42. जन्दु हुरि थफ दिथ कोम कोडनस तँय,
जल जल थपि थपि तम्य कोर ग्रास।
रुखमनि कँह फँल्य् थपि नीनस तँय॥
गछ्तो अस्तु वनतु भगवानस॥०॥

43. प्रय्मु भावुक कोम म्यूठ लोग तसतँय,
त्रोबवन राजुत तँम्य लोबनय।
लगयो स्वदामो अथ चारिरस तँय॥
गछ्तो अस्तु वनतु भगवानस॥०॥

44. समया रूजिथ स्वदामस तँय,
शुर्य बाँच गरु बार याद पेयि तस।
आँझन्या हैचनस गरु गछनस तँय॥
गछ्तो अस्तु वनतु भगवानस॥०॥

46. गरु युथ द्रामुत ओस नंगु मसतँय,
त्युथुय बेयि द्राव पोत फीरिथ।
मंदुछान ओस व्वन्य गरु गछनसतँय॥
गछ्तो अस्तु वनतु भगवानस॥०॥

47. वनि क्याह व्यचारान केंह नु वनुनस तेंय,
 सुशीला आशु मंज आसि प्रारान।
 डलि मा मन तस मै नंगु वुछनस तेंय॥
 गछतो अस्तु वनतु भगवानस॥०॥

48. व्वन्यु केंह काल ओस दरिद्रुक तस तेंय,
 अवु कारण द्राव युथ ओस त्युथ।
 कर्मलो न भूगनस येंच ओस मसतेंय॥
 गछतो अस्तु वनतु भगवानस॥०॥

49. द्वारिकायि वातनस स्वदामस तेंय,
 समया बास्योस ज्यूठ तय क्रूठ।
 ख्यनु मात्रस वोत मंज गामस तेंय॥
 गछतो अस्तु वनतु भगवानस॥०॥

50. द्वारिकायि नीरिथ च़ाव नॅगरस तेंय,
 ग्रैहॅ पीडायि ओस अंद वोतमुत।
 त्वता कृष्णु सुंज येंच करनस तेंय॥
 गछतो अस्तु वनतु भगवानस॥०॥

51. शांत शालुमारा ह्युव मन ओस तस तँय,
 भक्ति वति स्वदामा ओस द्रामुत।
 भक्ति भाव कृष्ण नाव ओस जपनस तँय॥
 गछतो अस्तु वनतु भगवानस॥०॥

52. दोरि दोरि फीरिथ तस भक्तिस तँय,
 कृष्ण कृष्ण जपान राथ क्यहो द्यन।
 खोरन हटव सुत्य छट्ट द्रायस तँय॥
 गछतो अस्तु वनतु भगवानस॥०॥

गरु वापस वॉतिथ पनुनि जोंफरि हुंजि जायि महलखानु
 डींशिथ गव सु सख परेशान तु लोग व्यदाख दिनि:—

53. स्यठा गव दिलगीर मंजु गामस तँय,
 नंजि जायि ड्यूंठ तँम्य महल खानाह।
 बुथि बुथि लोग दिनि गव ख्यूबस तँय॥
 गछतो अस्तु वनतु भगवानस॥०॥

54. थोकमुत तु लूसमुत गव बर मसतँय,
 कुसताम धनुवोल नंजि फोरमुत।
 यँच गोम हालिबद मैत्र तीर्थस तँय॥
 गछतो अस्तु वनतु भगवानस॥०॥

55. शुर्ग्य बाँच कोत गँयिम प्रुछु बो कस तँय,
 यँच फिकरन पेयि सनतोशी।
 आँदीन प्रथ कथ छय समयस तँय॥
 गछतो अस्तु वनतु भगवानस॥०॥

56. मँहल खानु मंजु च्वंजु दायि द्रायस तँय,
 व्यनती छिस करान जय बँविनय।
 सुशीला आरती संजु करनस तँय॥
 गछतो अस्तु वनतु भगवानस॥०॥

57. दोपनख क्याह कॉम बेछवुनिस तँय,
 रानी तुहुंजु सुत्य आसान छय।
 क्याजि छिव तंबुलावान मै गरीबस तँय॥
 गछतो अस्तु वनतु भगवानस॥०॥

58. सुशीला यि बूजिथ पानु द्रायस तँय,
 व्यनती सॉमियस तु जय जय कार।
 गरु बार तुहुंदुय च्वंजु दायि सोस तँय॥
 गछतो अस्तु वनतु भगवानस॥०॥

59. यॅलाज करि व्वन्य् ब्राँत्य् गछनस तॅय,
 दरिद्र ब्रह्मन छुस स्वदामा।
 क्याजि छख छॅलुरावान थॅकिमुतिस तॅय॥
 गछतो अस्तु वनतु भगवानस॥०॥

60. पोत गॅर बुकुर्य दॅर छय आसान तॅय,
 हेरु फेर ओसुय स्वदामस।
 हरदुय बास्योस नॅविस सोंतस तॅय॥
 गछतो अस्तु वनतु भगवानस॥०॥

61. छोट बोज स्वदामस टॉट्य द्रायस तॅय,
 जॉरी कॅरहस चोनुख अन्दर।
 ऐश्वरी डींशिथ गव आशचरस तॅय॥
 गछतो अस्तु वनतु भगवानस॥०॥

62. यि डींशिथ सुशीलायि गव कूपस तॅय,
 कोनय रोजिय सन्तोशी।
 कुसुय यार फॅसरिथ बु आछि कोरथस तॅय॥
 गछतो अस्तु वनतु भगवानस॥०॥

64. सुशीला यि बूज़िथ गॅयि पूरु मस तॅय,
मनु तारि लोयुन यारस नाद।
तॉर लॅज नु कृष्णस तोर वातनस तॅय ॥
गछतो अस्तु वनतु भगवानस ॥० ॥
65. स्वदामा कर्मु किन्य् मंजु शापस तॅय,
समयस प्यठ गव ज़ीवन मूख्य।
स्वय गॅती दितु कशमीर मंडलस तॅय ॥
गछतो अस्तु वनतु भगवानस ॥० ॥
66. दास 'माधव' दिलगीर बेकस तॅय,
समयन कोरमुत यच़ लाचार।
बाँय बंद मैथुर ह्यथ थोवतन सु सोस तॅय ॥
गछतो अस्तु वनतु भगवानस ॥० ॥

मीरां बाई

प्रेयमु हँच मीरा बोल बोश करान।

शहरु गामु कृष्णस छारानो॥

रामु रामु शामु शामु सुबु शामु वनुवान,

अमि रोस केँह बैयि ना ज्ञानानो।

अँदरिमि साजु छय सन्तूर वायान॥

शहरु गामु कृष्णस छारानो॥०॥

भेदु बावु त्रॉविथ चोन म्योन मँशरिथ,

एकतायि मंजु आँस प्रजुलानो।

प्रजलनु तँमि सुंजि साद संत तम्बुलान॥

शहरु गामु कृष्णस छारानो॥०॥

अँदरिमि गाशि आँस स्वदामस मानान,

सत् ग्वरु सुंज पूज करानो।

अमि वति भँक्त्यन म्वख्ती मेलान॥

शहरु गामु कृष्णस छारानो॥०॥

पांचन मंजु आँस पाँच प्रान मेलान,
 भखित गजु होंज राद त्रावानो।
 सुय जामु तस ब्रोंठ क्याह ओस शूबान॥
 शहरु गामु कृष्णस छारानो॥०॥

राजु गरि जामुचि मॉर्यमंजि मोल माज,
 शुर्य भावसुय मंजु रावानो।
 दैय अनुग्रेह छुस मोसुमि टोठान॥
 शहरु गामु कृष्णस छारानो॥०॥

बालु भावसुय मंजु संथा छि डेशान,
 कृष्ण ध्यानच पूज करानो।
 शुर्य भाव किन्हु छय सादस प्रछान॥
 शहरु गामु कृष्णस छारानो॥०॥

सादु मालि वनतम जोलि मंजु छुय क्याह,
 यूस छुख यूत मान करानो।
 सातस छुख नँ अमि निश छूयनु गछान॥
 शहरु गामु कृष्णस छारानो॥०॥

ही कूर्य अथ मंज इष्ट दीव आसान,
 न्यथ छुसन सुत्य पकुनावानो।
 जगतुक स्वामी सुय क्याह आसान॥
 शहरु गामु कृष्णस छारानो॥०॥

सादु मालि मेति दितु आसुहन पूजान,
 हृदयस मंज आसुहन बु ललवानो।
 ललुविथ तु सुलुविथ आसुहस बो गिन्दान॥
 शहरु गामु कृष्णस छारानो॥०॥

संसौर्य सादु मोल कोरि छुय डालान,
 बाजुर्य मूरचा दिवानो।
 पजि मनु मूरच मीरां ललवान॥
 शहरु गामु कृष्णस छारानो॥०॥

ल्वकची मोनुन कृष्णनुय माहराज,
 मानसिक पूज ओसुस करानो।
 सातु सातु क्षणु क्षणु भाव छुस गनान॥
 शहरु गामु कृष्णस छारानो॥०॥

सँदरस मंजु आँस ज़न ओस म्वख्तु दानु,
 सँदरस म्वख्तु दानु नैयंगलानो।
 डींश डींश ज़ॉनियन ज़्यव आँस कलान॥
 शहरु गामु कृष्णस छारानो॥०॥

दँहन त्रैन मंजु मीरा वातान,
 नेत्रुक संजु छिस करानो।
 माहराजु राजपूत मीरायि वातान॥
 शहरु गामु कृष्णस छारानो॥०॥

वॉरिव्यु गरि छय मॉलिकस वनान,
 कृष्ण मन्द्र छुम प्रेयानो।
 मन्द्रस मंजु छय कृष्णस पूजान॥
 शहरु गामु कृष्णस छारानो॥०॥

भँख़ितस नँ मोल मॉज, भँख़ितस नँ शुर्य बाँच,
 भँख़ितस नँ माय छाय आसनो।
 भँख़ितस नँ लूब ख्यूब मूलय आसान॥
 शहरु गामु कृष्णस छारानो॥०॥

दोहँ अकि राज़ छुय रॉनी डेंशान,
 मन्द्रस मंज़ आँस नचानो।
 इष्ट दीवस आँस मीरा रन्जुवान॥
 शहरु गामु कृष्णस छारानो॥०॥

राज़ छुय यिहोय सिर बेनि पनुनि बावान,
 मीरा देवानु बासानो।
 मूरँच ब्रोंठु कनि आँस डालु मारान॥
 शहरु गामु कृष्णस छारानो॥०॥

बेनेय छय बाँयिस ह्यडान तु गेलान,
 मँच त्रुय मीरा आसानो।
 ज़ॉम भाव होवनस खन्दु छस करान॥
 शहरु गामु कृष्णस छारानो॥०॥

बाँयिस त्रुयि हुंद भाव छय डालान,
 बन्दी खानु मीरायि त्रावानो।
 ज़ॉम हुंद मेछर खुर्यदार आसान॥
 शहरु गामु कृष्णस छारानो॥०॥

येलि येलि बूजुम ज़ॉम हुंद अफसानु,
 बाँयकाकन्य् नँ ख्वश यीवानो।
 सीतायि मीरा साँखी दीवान॥
 शहरु गामु कृष्णस छारानो॥०॥

मँशरिथ पर तु पान ज़ॉनिथ सु भगवान,
 शायि शायि जायि जायि आसानो।
 डींश डींश वुछ वुछ बेयि तिय डींशान।
 शहरु गामु कृष्णस छारानो॥०॥

दास 'माधव' छु वनान अफसानु,
 वँनिथ पानु ती नँ ज़ानानो।
 रामु अनुग्रेह सुत्य पानु गछि ज़ानान॥
 शहरु गामु कृष्णस छारानो॥०॥

रौव

वुछतु पानु क्रूठ क्याह छु संसार।

मीरा बन्द कँरुख दर गार॥

दयि सुंज ओसुस पॅरीक्षा,

बाँय माँन्य बेनि हुंज शिक्षा।

त्रुयि प्यठ आस नो कैह आर॥

मीरा बन्द कँरुख दर गार॥०॥

क्रख गॅयि नॅगरस तॅय शहरस,

डंडी थॅवहस पॅहरस।

मीरायि दय ओसुय सार॥

मीरा बन्द कँरुख दर गार॥०॥

जॉम हुंद खाम येलि प्वख्तु गव,

भगवान ज़ोनुख बॅन्योव शव।

बुजरस बन्नान छा ल्वकचार॥

मीरा बन्द कँरुख दर गार॥०॥

मीरां जॉनिख पागल,

पाँपियव कँरुहख गांगल।

मीरायि भगवान ओस सार॥

तस क्याह आसी बन्दन,
 युस आसि बन्योमुत नन्दन।
 प्रारान न्यथ तस बाल्यार॥
 मीरा बन्द कँरुख दर गार॥०॥

प्रहलाद खोरुख बरदार,
 पॉपियव ज़ोनुय सु लाचार।
 क्रयि रुपु समख्योस तति यार॥
 मीरा बन्द कँरुख दर गार॥०॥

व्यक्वंठा बन्योव अथ गारस,
 डेडि वॉल्य् वनान शहरु यारस।
 प्रज़ुलान रातस छय क्याह गार॥
 मीरा बन्द कँरुख दर गार॥०॥

मीरां कृष्णस सुत्य मुहिथ,
 योरुक नें मुलय तस हय्स।
 इष्टु दीव तस ओस सार॥
 मीरा बन्द कँरुख दर गार॥०॥

दासु भाव 'माधव' वनान छुय,
 ब्रमु संसारस तारुन सुय,
 तार दिस यवु तवु रोजुस सार॥
 मीरा बन्द कँरुख दर गार॥०॥

मीरां भाई

बॅन्दी खानस मंज छय देवानु,
 सायस सुत्य आँस गिन्दनो।
 मीरा सातु सातु मँच आँस बासान॥
 शहरु गामु कृष्णस छारानो॥०॥

दोह आयि सोरान ज़ॉम आव बोहरान,
 मीरायि पिटारु सोज़ानो।
 राजन बूज़नय हलुकुबन्द दिवान॥
 शहरु गामु कृष्णस छारानो॥०॥

अथ मंज ज़ॉम ओस सुज़मुत शहमार,
 मीरायि आसि व्वन्य बुछानो।
 जँहरीलु सरफस हलुकु बन्द बनान॥
 शहरु गामु कृष्णस छारानो॥०॥

यस नु दय मारि तस क्याह परवाय,
 मीरायि भगवान रछानो।
 भख्तियून पनुन्यन खेलु छुय हावान॥
 शहरु गामु कृष्णस छारानो॥०॥

लटि अकि ज़हरु प्यालु बर्था दिवान,
 सालिगराम अमर्यथ वनानो।
 ज़हरस मीरायि अमर्यथ बनान॥
 शहरु गामु कृष्णस छारानो॥०॥

मीरां मॅत्य् मॅत्य् यॅच गॅयि मस्तानु,
 वयराग फल छुस मेलनो।
 बन्दी खानु मंज़ आज़ाद गछान॥
 शहरु गामु कृष्णस छारानो॥०॥

वयराग अमर्यथ न्यथ आँस चवानु,
 वयराग राग तस गनानो।
 साक्षात इष्ट दीवस आँस यछान॥
 शहरु गामु कृष्णस छारानो॥०॥

नोन खोन छोट क्रहुन यकसान वुछानु,
 फेर वॅन्य तॅमिसुय डेशनो।
 ‘माधव’ रामु नाव टूट्यनुय पॉन्य पानु॥
 शहरु गामु कृष्णस छारानो॥०॥

गज़ल - 3

येम्बरज़ल अशकने नारय,
दज़ान छस लोलरे बुम्बरो।
बन्यम कति मे दीदार चान॥
सोरथ बो गरि गरे बुम्बरो॥०॥

दमा यिखना चु बोज़ख सोज़,
दिलुक तमुनाह मे गछि पूर्य।
छनान छेस वावु पोह पन ज़न॥
बु बलु चाने यिनय बुम्बरो॥०॥

खताह क्याह छुम चे रोटथम वन,
दिवान छुस वॅन्यु बु कर डेंशन।
गुलन वुछ वुछ कलान छॅम ज़्यव॥
दज़ान छुस लोलरे बुम्बरो॥०॥

वनान छुय 'दास माधव' ज़ार,
बार साहिबो गोश तस चु दार।
चे रोस कॅस वनि चु बोज़ विलुज़ार॥
चे बोज़ुम लोलु हेति बुम्बरो॥०॥

बोग - 2

भजन - 1

करू सविकार सोनुय नमसकार,
 भगवान गोपी नाथ चै जय जय कार।
 तारान भँख्तयन असि ति दितु तार॥
 भगवान गोपी नाथ चै जय जय कार॥०॥

बूजमुत छुख करान मुशिकलन हल,
 गुल्य गँडिथ प्रारान छिय डेडि तल।
 कस वनव चैय रोस वनुनस नु वार॥
 भगवान गोपी नाथ चै जय जय कार॥०॥

गट्ट छम अँन्दरी टुफ ज़ालतम,
 गटि कुठ अचुथिय गाह मै त्रावतम।
 तमु गाह च़लि मै वन्दि गट्टकार॥
 भगवान गोपी नाथ चै जय जय कार॥०॥

च़ुय म्योन बब तु माँज च़ुय सत् ग्वर,
 च़ुय म्योन रहबर ज़ानुक स्वर।
 स्वरनाव मै विज़ि विज़ि अख ओंकार॥
 भगवान गोपी नाथ चै जय जय कार॥०॥

आमुत शरन च़ेय ज़ार करनेय,
 दकुलद आमुत्य च़ेय शरनेय।
 आश असि च़ौनी बोज़ विलुज़ार॥
 भगवान गोपी नाथ च़े जय जय कार॥०॥

मटि छुम खोतमुत अटि छुम बोर,
 च़ेय रोस छुम ना कांह मे सोर।
 होरु क्यथु पोत बोर क्यथु लग्यम तार॥
 भगवान गोपी नाथ च़े जय जय कार॥०॥

मोहें क्रमुनुय छुम नाल वोलमुत,
 क्यथु तरु छुस आवल्लनि लोगमुत।
 तार दिम भवुसरु यियनय आर॥
 भगवान गोपी नाथ च़े जय जय कार॥०॥

जन्मु जन्मु फीर्य फीर्य ग्यूर मे आम,
 यितु गछ क़र्य क़र्य रूदमुत बु खाम।
 दृष्टी चानि प्वख्तु बनु बो म्वख्तु हार॥
 भगवान गोपी नाथ च़े जय जय कार॥०॥

मोहँ पूतनायि दितु मुह बबि मे दाम,
 तमि दामु युथ बु लबु प्रेयमय दाम।
 सु दाम च्यथ वजि जिरुबम तार॥
 भगवान गोपी नाथ चै जय जय कार॥०॥

व्यन्ती बबु बोज कर बनि कल्याण,
 अधर्मु तु पापन हुंज खँचमु हान।
 तचि तावि लँग्यमुत्य दितु शेहजार॥
 भगवान गोपी नाथ चै जय जय कार॥०॥

‘दास मजलूमस’ वन्दि अनि गोट,
 तार कति लगि तस करुस अथु रोट।
 हमखूर रटुस नावि अदु लग्यस तार॥
 भगवान गोपी नाथ चै जय जय कार॥०॥

भजन - 2

संत गोपी नाथ सानि भगवानो,
दितु दर्शुन चोन लोल आमो।
भँख्ती रस मै चावुम दामु दामो॥
दितु दर्शुन चोन लोल आमो॥०॥

लारान आस बो चानि डेडि तल,
रछतम पनुन्यन चरुणन तल।
युथ बु स्वरु चोन नाव सुबु शामो॥
दितु दर्शुन चोन लोल आमो॥०॥

जगतुक छुख कल्याण कारक,
आशावान छुस भवुसरु मै तारख।
तार दिम भवुसरु भगवानो॥
दितु दर्शुन चोन लोल आमो॥०॥

ओंमकार शब्द मनुकनि मै गरुतम,
कुनुय आकार च्यतुसुय मै थावतम।
परमु दामुक दाम चावुम दामु दामो॥
दितु दर्शुन चोन लोल आमो॥०॥

मुह मायायि निश दूर थावतम,
 च्यथ ईकागर मे करनावतम।
 नेशुकलु मे स्वरनाव रामु रामो॥
 दितु दर्शुन चोन लोल आमो॥०॥

काम क्रूधु निशि मे दूर थावतम,
 कुनुय ओमकार शब्द स्वरनावतम।
 चरणु अमर्यत मे चाव दामु दामो॥
 दितु दर्शुन चोन लोल आमो॥०॥

ज़ार बोज़ बबु भगवानु यीनय आर,
 कर्मखुर कासतम दितु मैति तार।
 सारिकुय सार छुख भगवानो॥
 दितु दर्शुन चोन लोल आमो॥०॥

भँखुत्य् आमुत्य लारान अज़ योर,
 मुचुरावतम व्वन्य् बरुन्यन तोर।
 भँखुत्य् जायि जायि छि चै पूज़ानो॥
 दितु दर्शुन चोन लोल आमो॥०॥

‘मज़लूम दासस’ छय सथ चॉनी,
 आमुत शरण करुस बब नज़रि सॉनी।
 नज़रि चानि तार लग्यूस बबु भगवानो॥
 दितु दर्शुन चोन लोल आमो॥०॥

भजन - 3

सथ छम मे चॉनी सत् ग्वरो,
वथ असलुची मेति हावतम।
बवुसरु तारुम थफ कॅरिथ,
हमखूर लागुम मे सत् ग्वरो॥०॥

वांति रोस सागर तरु क्यथु बो,
आवुलुनि नाव छम अरु आस बो।
बाल लाग नाव म्याँन्य् सू हमु सरो,
करनावि तारुम सत् ग्वरो॥०॥

पोत बोर ह्यथ आमुत छुस बु योर,
फट्ट मा क्यथु तरु बवुसरु अपोर।
नामु सुमरन दिम बु ति तरु अपोर,
थफ थावतम व्वन्य मे सत् ग्वरो॥०॥

ब्रमु संसॉर्य बो ब्रमुरॉवुस,
मुह अनिगटि मंज वति रोवुस।
वथ मे हाव सतुची बु ति तरु अपोर,
तारु तरु जेरि अकि चानि सत् ग्वरो॥०॥

चनचल मन म्योन छुम नु हमन,
 दमु दमु रोज़तम सुत्य मे दमन।
 मनु कलि दुय गाल रोज़तम दमन,
 सन्युच्यथ मे रोज़तम सत् ग्वरो॥०॥

कल्पुनायव निशि मे दूर थावतम,
 मन ईकागुरु करनावतम।
 लूब मुह मदु निशि दूर थावतम॥
 यी छुम मनस मे सत् ग्वरो॥०॥

हनि हनि मे गॅनिराव मनि कामन,
 नाव युथ बु स्वरुहा सुबु शामन।
 दृष्टि चानि बनि सरतल मे स्वन॥
 म्वख्तु बनु बु नज़रि चानि सत् ग्वरो॥०॥

पानस अन्दर बिहिथ पानस,
 अँन्य सारि छारान जहानस।
 वति मा डलु सन्म्वख मे रोज़॥
 बरु मा गछु नतु सत् ग्वरो॥०॥

‘दास मज़लूम’ बर तल छुय गदा,
 शरमसार चन्दु छोन बोजुस सदा।
 छरि अथु छुनु सोदा बनान॥
 बनुस सोदागुरु चु सत् ग्वरो॥०॥

भजन - 4

सन पानस द्यू अँदरी कन,
छुय वजान तति चे ज़ीरो बम।
सुर तु ताल मिलुनाव साज़ि सू हम॥
छुय वजान तति चे ज़ीरो बम॥०॥

ज़िलु च्यन तारन कड कुनुय सम,
जेरि अकि बोलन कुनुय सू हम।
सूहम स्वरान ज़ीव अँदरी श्रम॥
छुय वजान तति चे ज़ीरो बम॥०॥

मिलुवन करतो शहस तु प्राणस,
जान गछि सुत्य चे जानानस।
दमस सुत्य थाव दम चु हरदम॥
छुय वजान तति चे ज़ीरो बम॥०॥

ग्वरु सुंद्यन पादन कर चु प्राण अर्पण,
ब्रमु सरु तारान छुय सु भँख्त्यन।
साधनायि नावि छुय सु खूर तय हम॥
छुय वजान तति चे ज़ीरो बम॥०॥

श्वासु ओश्वासु सत् ग्वर स्वरुन,
 भावनायि सुत्य गोछ तस लोल बरुन।
 लोलु सुमरनि चलि गोसु तय गम॥
 छुय वजान तति चे ज़ीरो बम॥०॥

ग्वरु सुंजि नज़रि सुत्य चलन अवग्वण,
 अज्ञानु गटि चु लगियो छय्न।
 हनि हनि वॅनि कडुन थवुन बाहम॥
 छुय वजान तति चे ज़ीरो बम॥०॥

सरु योद करख चु पनुनुय पान,
 मालूम सपुदी कारि इन्सान।
 अहम भाव त्रॉविथ रोज सरखम॥
 छुय वजान तति चे ज़ीरो बम॥०॥

‘दास मज़लूम’ वॅन्य द्यू पानस,
 अछ अंदर वॅन्य द्यू जानानस।
 अशकु मस चावि सु जामे जम॥
 छुय वजान तति चे ज़ीरो बम॥०॥

भजन - 5

मन मारुन चु छारुन दय,
 लयि अनतन सु पय—दर—पय।
 दुय कासतो चे टोठी दय॥
 लयि अनतन सु पय—दर—पय॥०॥

लूभ मोहु निशि पान थाव दूर,
 दयि नाव स्वर चे बखशी सूबर।
 मनु तार वाय जीरु बम तु नय॥
 लयि अनतन सु पय—दर—पय॥०॥

हनि हनि कर चु गनि पानस,
 गनि गनि बर सु खुमखानस।
 ठानु थाँवज्यस खामरोजिनु म्वय॥
 लयि अनतन सु पय—दर—पय॥०॥

बेनि बोय कस द्रामुत छु सार,
 तिम छि सॉरी चन्दुकी यार।
 यावर छुय फ़कथ अख दय॥
 लयि अनतन सु पय—दर—पय॥०॥

सत् ग्वरस चुय बरतो लोल,
 सत् ग्वर छुय चु तारनवोल।
 तस छु ब्रमसरु तारनुक पय॥
 लयि अनतन सु पय—दर—पय॥०॥

लछिनॉविस नाद चुय लाय,
 गछि कुठि कर तस व्वन्य चु जाय।
 वछिसुय मंजु कडू तस चु पय॥
 लयि अनतन सु पय—दर—पय॥०॥

मनि सँदरस डुंगि पानु वस,
 दुरदानु हय्थ तोरय चु खस।
 पय थॉवज्यस सुत्य थॉवजस चु लय॥
 लयि अनतन सु पय—दर—पय॥०॥

चोन म्योनुय वनुन चु मँशराव,
 तस कुनिसुय चु पान पुशराव।
 ज़िन्दु मरि पथ करू व्वन्य चु तय॥
 लयि अनतन सु पय—दर—पय॥०॥

‘दास मजलूम’ गरि व्वन्य चु नेर,
 यार छारुनि डेरु डेरु फेर।
 अकि नतु अकि लबुख पानय पय॥
 लयि अनतन सु पय—दर—पय॥०॥

भजन - 6

बर तल आमुत माँज मै वरतम,
 माँज भवॉन्य पनुनी दया करतम।
 आसर चोन अनुग्रेह मै करतम॥
 माँज भवॉन्य पनुनी दया करतम॥०॥

शखती रुपु छख दर्शुन मै हाव,
 भक्ति भाव मनि मंज मै गॅन्यराव।
 साक्षात रुपु सनम्वख रोज़तम॥
 माँज भवॉन्य पनुनी दया करतम॥०॥

अन्नतु सिर्यन हुंद चोन प्रकाश,
 गटि कुठि अनतम आत्म प्रकाश।
 मनि कलि मंज मुंह मद् गालतम॥
 माँज भवॉन्य पनुनी दया करतम॥०॥

दीवन हुंज छख माँज आदि दीव,
 सर्वशक्तिमान जगतुच आदि दीव।
 पाप शाप यिम छिम तिम मै हरतम॥
 माँज भवॉन्य पनुनी दया करतम॥०॥

प्रथ शायि आसवुन चोनुय स्थान,
 मॉज भवॉन्य कासतम मुंह अभिमान।
 अज्ञानुक मॉज ऑलिफ मे गालतम॥
 मॉज भवॉन्य पनुनी दया करतम॥०॥

ज्ञानु सॅदरस अन मे अँन्दरी ग्रख,
 युथ बु मॉज रोज़हा च़ेय सनम्बख।
 ज्ञानु सॅदरुक रस मॉज दामु चावतम॥
 मॉज भवॉन्य पनुनी दया करतम॥०॥

चंचल च्यथ म्योन वति डोलमुत,
 मुंह जंजालस मंज सु फोटमुत।
 चंचलतायि निशि मे दूर थावतम॥
 माज भवॉन्य पनुनी दया करतम॥०॥

संसार चूर छुम छॅलुरावान,
 मुहु अनि गटि छुम फिरुनावान।
 नज़रि अकि चानि सुत्य बनु मँहकम॥
 माज भवॉन्य पनुनी दया करतम॥०॥

रिवान 'दास मज़लूम' चानि डेडि तल,
 छुय हलम दॉरिथ म्वकुलावुन जल।
 ज़गि हुंद कल्याण छुय मंगान हरदम॥
 मॉज भवॉन्य पनुनी दया करतम॥०॥

भजन - 7

शरण आसय परन प्योसय,
क्षमा कर शिव शंकर जी।
वरुम पादन तल करुम अनुग्रेह॥
हरुम पाप शाप शंकर जी॥०॥

मुहु गटे अन्दर प्योमुत,
स्वरूपस निशि बु दूर्योमुत।
च्यतस रोज़तम शिलन मंज़ बाग॥
बु पूजुहथ पानु शंकर जी॥०॥

हचरलद छुस शरन आमुत,
कैरिथ लटु लठ मचर आमुत।
लटे अकि व्वन्यु मे दर्शुन हाव॥
चु भोलानाथ शंकर जी॥०॥

असर बोज़ सुत्य गोमुत यीरय,
चु म्योन सर पोश मे भाव सीरय।
मे स्वख म्वखु दितु भवुसर तार॥
चु हमखूर लाग मे शंकर जी॥०॥

बु ओन रोन छुस पथर प्योमुत,
 स्यठाह दिलगीर छुस गोमुत।
 मे आसरु चोन मे हरम्बख बास॥
 चु सास भासकर शंकर जी॥०॥

मने अन्दर मे करतम वास,
 चु छुख अमर मे मर—मर कास।
 मे अरुसरु ज़नमन हुंज कास॥
 चु बखशन हार शंकर जी॥०॥

च्यतस रोज़तम मे छम चॉन्य् सथ,
 वते लागतम मे रोज़ वतुगथ।
 मे सथ ज़नन सुत्य दितु व्वन्य् तार॥
 मे तार तारुम शंकर जी॥०॥

बु गॉफिल छुस मे गफलत कास,
 अँज्ञानी छुस अज्ञान मे कास।
 प्रत्यक्ष रोज़तम मे सनम्बख बास॥
 चे यीना पास शंकर जी॥०॥

छु 'दास मज़लूम' गदा बरतल,
 स्वनस गॉमुच छि तस सरतल।
 चु दिस दर्शुन बनय्स म्वख्तुहार॥
 सु नॉल्य् त्राविही शंकर जी॥०॥

भजन - 8

मुह नेंदरे मन वुजुनावुन,
 बोलुनावुन सू हम सू।
 भाव सुमरनि मन मस चावुन॥
 बोलुनावुन सू हम सू॥०॥

अंहकारुक बानु फुटरावुन,
 अहम त्रावुन रठ दयि नाव।
 दय त्रे मेली लयि पान थावुन॥
 बोलुनावुन सू हम सू॥०॥

मनि मंजुलिस मंज बाग थावुन,
 लयि अंतन सु जेरि जेरि यार।
 ज्ञान कर तस ल्वलि ललुनावुन॥
 बोलुनावुन सू हम सू॥०॥

दयि नाव पानु मनि शोमरावुन,
 दमु दमय तस बर चु भाव।
 मनि बागस लाल सुलुनावुन॥
 बोलुनावुन सू हम सू॥०॥

सतुकुय रस मन चावनावुन,
 व्यचारु जल तन मन चु नाव।
 सथ ग्वरस गोछ पान पुशुरावुन॥
 बोलुनावुन सू हम सू॥०॥

दोह ना रूद्य काँसि नय रूद यावुन,
 दोह अकि त्रावुन छुय यि संसार।
 यी चु येति दिख ती तति चे छावुन॥
 बोलुनावुन सू हम सू॥०॥

व्यचारु जल तन मन चु नावुन,
 व्यचार नाग हरम्बख चु लार।
 शमु दमुय भ्रम प्रजुनावुन॥
 बोलुनावुन सू हम सू॥०॥

सथ युगुक अभयास थावुन,
 पाँछ प्राणव थफ तस चु थाव।
 यिनु गछनु निशि पानु म्वकुलावुन॥
 बोलुनावुन सू हम सू॥०॥

‘दास मजलूम’ चु जामु रंगुनावुन,
 मुहु जामय चँटिथ व्वन्य चु त्राव।
 निशि चे पानस चु पानु प्रजुनावुन॥
 बोलुनावुन सू हम सू॥०॥

भजन - 9

रामु रामु स्वरतन करू रामु कीर्तन,
 राम गछि चै पानय मन।
 भावनायि स्वरतन करुस सौरुय अर्पण॥
 राम गछि चै पानय मन॥०॥

मुहुकल त्रॉविथ कलि रटुन दर मन,
 कलि नेर रटुन सु न्यरगवण।
 बानु कुठि अन्दर्य ठानु थाव बानन॥
 राम गछि चै पानय मन॥०॥

संसार भ्रम छुय युन तु गछुनये,
 कवु ज़ीवु छुख दिवान दम।
 दमु दमु स्वरतन हरदम सु न्यरगवण॥
 राम गछि चै पानय मन॥०॥

अँन्दरी अछ अन्दर वँन्य् द्यू दर मन,
 नेंदरि कवो छुख हुशयार बन।
 बनि योद चे पानस कुवु बेयेन मंगन॥
 राम गछि चे पानय मन॥०॥

आलु दितु कर्म भूमि मेचि कर चु मिलुवन,
 दतु फुटरावुस ध्यानु सुमरण।
 सुमरनि तसुंजे द्वदरिस गुलफ्वलन॥
 राम गछि चे पानय मन॥०॥

यनु मंज्य सग बर मनुक्यून डूरयन,
 रॉस्य युथ नु गछी रॉछ कर चु तिमन।
 रॉछ कर चु हैलि नेरि पानय दर मन॥
 राम गछि चे पानय मन॥०॥

न्युंदु कर चु पानस खाम युथ नु रोज़ि मन,
 खाम योद रोज़ख हामु नाल वलन।
 फलि फलि गुल फ्वलन पानय चे दर मन॥
 राम गछि चे पानय मन॥०॥

लावि लावि गंड करुस थावुन निशि पानस,
 गोन करुस मनि मंज थावुन मंज बाग।
 मनु कुछि बरतन दम दिस दर मन॥
 राम गछि चै पानय मन॥०॥

कायायि कुल छुय दैरिथ प्यठ मूलन,
 द्रोत वाय यँन्दरियन गोड बर चु मूलन।
 पंप सग बरतस नखि फल वातन॥
 राम गछि चै पानय मन॥०॥

‘दास मजलूमो’ जागि कोनु रोजन,
 दिह दारि त्रौपरिथ कोनु चु जागरथ करन।
 जागरति तसंजे रुम रुम चै शेलुहँन॥
 राम गछि चै पानय मन॥०॥

भजन - 10

सुहा छुय चै निश तय ज्ञान कर च़ु पानस,
सुहा निश च़ु पानस च़ु पान प्रज़ुनाव।

लोलु सान रज़कर सुत्य जानानस॥

सुहा निश चै पानस च़ु पानु प्रज़ुनाव।

दर मन वॅन्य द्यू मंज़ गुलिसतानस,

दर मन च़ु छावख गुल तु गुलज़ार।

शोरि लाग च़ॉर्य च़ॉर्य तस बागुवानस॥

सुहा निश चै पानस च़ु पानु प्रज़ुनाव॥०॥

सनि वस सौन ज़ीवु वोन द्यू पानस,

हनि हनि रठतन सु मदनवार।

मदुवस तु हदु रोज़ रठतन निश सु पानस॥

सुहा निश चै पानस च़ु पानु प्रज़ुनाव॥०॥

माज़ पनुनुय लद देगि दहानस,

रच़ि रच़ि बाँगरुन च़ु करुन आहार।

ज़्यनु ब्रोंठ जाय रठ मंज़ शुमशानस॥

सुहा निश चै पानस च़ु पानु प्रज़ुनाव॥०॥

जीवो योद लबुन छुय गछतो ध्यानस,
 मनुसर डुंग दिथ लबख लँदरुहार।
 ध्यानु रजि गंड कर सुत्य जानानस॥
 सुहा निश चै पानस चु पानु प्रजुनाव॥०॥

जिखरे ओम के गंड छुन चु पानस,
 वन्दि छुय सु बन्दु बन्दु करख दीदार।
 रुम रुम राम गछि च्यथ चै पानस॥
 सुहा निश चै पानस चु पानु प्रजुनाव॥०॥

सुहा छुय चै कनि तय सु काबु खानस,
 सु छुय संगु मंज अमर्यत दार।
 खाम मो रोज जुवु दामु च्यतु पानस॥
 सुहा निश चै पानस चु पानु प्रजुनाव॥०॥

‘दास मजलूमो’ मैचि रल चु पानस,
 मैचि मंज चै फवलनय गुल तु गुलजार।
 तिमुय गुल शेरि लाग यारि जानानस॥
 सुहा निश चै पानस चु पानु प्रजुनाव॥०॥

भजन - 11

हनि हनि मनि छम चॉन्य लोलु कामन,
पामन मो कर मै जाय।

लोलु बो ललुवथ रोट मै चोन दामन॥
पामन मो कर मै जाय॥०॥

नालान बु वेरि चानि शहरु तु गामन,
लारान कोनु यिवान।

कीनु त्राव सीनु फोट मै रटनि आस दामन॥
पामन मो कर मै जाय॥०॥

दर्दु नयि फ्यूरुस ह्यथ मनि कामन,
परदु च़ठ मै दीदार हाव।

हावख नय लोलु चानि चाख दिमु जामन॥
पामन मो कर मै जाय॥०॥

शोकु चानि लोलु थरि फॅल्युमो बामन,
कोलु सारि कोनु छावान।

यिख नु तय बरु गछु लगुमा पामन॥
पामन मो कर मै जाय॥०॥

रंगर वानु आस बु रंग दिनि जामन,
 नेब आम अँशमुकाम।
 तशनु लब प्रारान अँशकुन्यून जामन॥
 पामन मो कर मै जाय॥०॥

वन विगनि वनुवान सुबहन तु शामन,
 दर मन ह्यथ चोन नाव।
 सू हम स्वरनय वायान सुबु शामन॥
 पामन मो कर मै जाय॥०॥

‘दास मजलूमस’ कथि कॉरख कामन,
 सु दामन चोन रटनि आव।
 नज़रि चानि द्वदरिस फवलनस बामन॥
 पामन मो कर मै जाय॥०॥

भजन - 12

मरि मोर क्याह म्वच्चि, क्याह निख सुत्य,
 यि मोर रलि आँखर मैच्चि सुत्य।
 कुत्य आयि तु कुत्य गँयि, क्या न्यूख सुत्य॥
 यि मोर रलि आँखर मैचे सुत्य॥०॥

वाटु दिथ आख तोरु संसारस,
 तारु तरुन योरु करनावि तारस।
 चन्दु छोन क्यथु तरख नावु तार न्यू सुत्य॥
 यि मोर रलि आँखर मैचे सुत्य॥०॥

यिथ क्याह ह्योन नियुन यथ समसारस,
 पायिदोरी छा ना पायिदारस।
 तरि सुय यस आसि सत् ग्वर सुत्य॥
 यि मोर रलि आँखर मैचे सुत्य॥०॥

संसार माया ज़ालुक वान,
 येति गँयि कम कम अथु हावान।
 पोत बोर पानो युथ ना निख सुत्य॥
 यि मोर रलि आँखर मैचे सुत्य॥०॥

भ्रम संसार सोर द्राव नु काँसे,
 गरु गरु कोरुथ सॉर्यसुय वाँसे।
 वाँस रावरॉवुम पानु क्याह निमु सुत्य॥
 यि मोर रलि आँखर मैचे सुत्य॥०॥

गफलत त्राव व्वन्य गछ बेदार,
 वुनि छय सुल छांडुन मदनवार।
 शिलु पचि मंज बाग थावुन सुत्य॥
 यि मोर रलि आँखर मेचे सुत्य॥०॥

कोत गँयि बब तु मॉज सन पानस,
 वारि वारि द्रायि तिम गँयि पानस।
 कांह द्राव नु अज ताम काँसे सुत्य॥
 यि मोर रलि आँखर मेचे सुत्य॥०॥

दयि नाव छुय अख युस छुय सार,
 सुय छुय भ्रमुसरु कुय नावि तार।
 भवुसरु तार लगि तमि नावि सुत्य॥
 यि मोर रलि आँखर मेचे सुत्य॥०॥

शेश कलि मन व्वन्य वुजुनावुन,
 मनि मंदरस मंज चु यार गारुन।
 अनुग्रेह तसुंदि तरख जेरि अकि सुत्य॥
 यि मोर रलि आँखर मेचे सुत्य॥०॥

‘दास मजलूम’ अभ्यासी बन,
 गरि गरि स्वरतन नारायण।
 अंत समयस तरख तमि नावि सुत्य॥
 यि मोर रलि आँखर मेचे सुत्य॥०॥

भजन - 13

मनकुय कोसतूर बोलान छु,
हरम्बखु वन कुस बैसिथ छु।
वनि कडुन दर मन हनि हनि सू॥
हरम्बखु वन कुस बैसिथ छु॥०॥

दुयि हुंद दुयि कास रटुन सू,
शास ओशवास जफ गोविन्द गू।
सुय छुय हैरि तय ब्वनु छुय सू॥
हरम्बखु वन कुस बैसिथ छु॥०॥

कुकिलि हुंद रंग दधि छारुन सू,
वनु वनु फेरुन मेली सू।
तीलिथ ह्यरु बोनु मील्लिथ सू॥
हरम्बखु वन कुस बैसिथ छु॥०॥

क्वलटूच सुंदय पौदय जागि रोज़ चु,
आत्म गाडु वुछथी डुंग लाय चु।
डुंग दिथ बरतन मनि मंज सू॥
हरम्बखु वन कुस बैसिथ छु॥०॥

बुलबुल बोलान विजि विजि छु,
पोशुनूल बोलान गोबिन्द गू।
अडुकोल कोतुर वनान गू गू॥
हरम्बखु वन कुस बैसिथ छु॥०॥

मारुन मदु मुह रिन्द बन चू,
 जिन्दु पानु मर सौ रटुन सू।
 कावु सुंद टावु टाव त्रावुन छू॥
 हरम्बखु वन कुस बैसिथ छू॥०॥

कुस छु ह्यौंद कुस मुसलमान छू,
 कावु बुत खानु तस निश कुनुय छू।
 अला हू ज़फ या ज़फ सू हम सू॥
 हरम्बखु वन कुस बैसिथ छू॥०॥

रहीम कुस छु राम कुस छू,
 राम कर च्यथ पनुन छारुन सू।
 कम रंग तसुंद्य पानु बेरंग छू॥
 हरम्बखु वन कुस बैसिथ छू॥०॥

बोलान कुस ताम मनि मंज छू,
 हरसातु बोलान सू हम सू।
 कन दितु पानो वन कुस छू॥
 हरम्बखु वन कुस बैसिथ छू॥०॥

‘दास मज़लूम’ ब्रम संसार छू,
 गछ शरन सत् ग्वरस तारु तारान सू।
 वेलु वोत यि मोर त्राँविथ गछुन छू॥
 हरम्बखु वन कुस बैसिथ छू॥०॥

भजन - 14

भावुक्य पम्पपोश लागय शेरे,
 सत ग्वर वेरि चानि अज आमृत योर।
 पादि कमल थावतम प्यठ मै शेरे॥
 सत ग्वर वेरि चानि अज आमृत योर॥०॥

सू हम स्वरनाव मन मै जेरि जेरे,
 रुम रुम स्वरनाव शेवु शम्बू।
 ग्रट्ट अनवॉर्य लाग जॉव्युल नेरे॥
 सत ग्वर वेरि चानि अज आमृत योर॥०॥

शेश कलि दम बर खसतो हेरे,
 ओंम शब्दु स्वरनुय लबख ब्रम ज्ञान।
 हरम्बख सु आसुवुन रटुन जेरि जेरे॥
 सत ग्वर वेरि चानि अज आमृत योर॥०॥

व्वंदुचन तारन सुर कड जेरे,
 दारि बर त्रौपरिथ वाय जीरबम तार।
 साज्जनदर सु पानय थावुन प्यठ शेरे॥
 सत ग्वर वेरि चानि अज आमृत योर॥०॥

पाँछ प्राण थफ थाव युथ नु गछख क्रेरे,
 निश पानस छुय युथ नु त्रावख नाव।
 हमखूर अथि तस तारी अकि जेरे॥
 सत ग्वर वेरि चानि अज आमुत योर॥०॥

अँन्दरी छारुन न्यबर युथ नु नेरे,
 यँन्दरे चूर युथ नु लागी हान।
 पानय पान खार तसुंजे हेरे॥
 सत ग्वर वेरि चानि अज आमुत योर॥०॥

शाहसवार बनतो शाह युथ नु नेरे,
 शाहस तु प्राणस कर मिलचार।
 दम बर अँन्दरी न्यबर युथ नु नेरे॥
 सत ग्वर वेरि चानि अज आमुत योर॥०॥

रामु सुमरनि सुत्य वन्दि स्नेह फेरे,
 रामु नाव भ्रमुसरु छुय नावि तार।
 व्यथ चेनुनावुन रटुन जेरि जेरे॥
 सत ग्वर वेरि चानि अज आमुत योर॥०॥

‘दास मजलूम’ नेर यारु सुंजि वेरे,
 पय ह्यस सु छारुन यारय बल।
 लयि रोज सुत्य तस पय युथ नु सोरे॥
 सत ग्वर वेरि चानि अज आमुत योर॥०॥

भजन - 15

दयो करतम दया पानय,
 बु मा ज्ञानय करुन्य् चॉन्य पूज।
 दया सागर चु छुख पानय॥
 बु मा ज्ञानय करुन्य् चॉन्य पूज॥०॥

गदा आमुत चे निश अज योर,
 करुम नजरा मे छुम अटि बोर।
 चु छुख ज्ञानुवन बु अनज्ञानय॥
 बु मा ज्ञानय करुन्य् चॉन्य पूज॥०॥

मे संसार चूर छलुरावान,
 मुह मद छुम पतय लारान।
 अपुज कॅर्य कॅर्य मे बॅर्य बानय॥
 बु मा ज्ञानय करुन्य् चॉन्य पूज॥०॥

बु औन रोन छुस प्योमुत बरतल,
 स्वनस गॉमुच मे छम सरतल।
 मनुक मल गालतम पानय॥
 बु मा ज्ञानय करुन्य् चॉन्य पूज॥०॥

बु गॉफिल छुस मे गॅफतल कास,
 मे सनम्बख रोज़ च़े यिथि ना पास।
 मे जॉन्ग् हुंद मस च़ु चाव पानय॥
 बु मा ज़ानय करुन्ग् च़ॉन्ग् पूज़॥०॥

हरी हरतम मे पाप सॉरी,
 मे गोश थावतम च़ु बोज़ जॉरी।
 दितम दर्शुन बु नालानय॥
 बु मा ज़ानय करुन्ग् च़ॉन्ग् पूज़॥०॥

च़ु दाता छुख मंगान बिक्षा,
 हलम दॉरिथ मे दिम दीक्षा।
 च़ु सारुक सार छुख पानय॥
 बु मा ज़ानय करुन्ग् च़ॉन्ग् पूज़॥०॥

अज़ॉनी छुस वनान छुस बु ज्ञान,
 दिवान दम छुस ऑसिथ अनज़ान।
 सतुक व्यचार मे भाव पानय॥
 बु मा ज़ानय करुन्ग् च़ॉन्ग् पूज़॥०॥

रवा मा छु गछुन निशि मे दूर,
 मे कोरमुत लोलु नारन सूर।
 च़े पथ **‘दास मज़लूम’** गव देवानय॥
 बु मा ज़ानय करुन्ग् च़ॉन्ग् पूज़॥०॥

भजन - 16

नदुरुय छुय संसार।
रामु नाविय ओत सार॥

रामु नाव छुय स हमई,
अमि सुत्य नावि लॅमय।
अटु वाति गाठ सॉन्य नाव॥
रामु नावय ओत सार॥०॥

प्राण छिय परु सन्दी,
दय ज़ानि कर सु मॅग्यि।
तेमि विजि यॅच लगान लार॥
रामु नावय ओत सार॥०॥

यावुन नु रोज़वुनय,
अपजि नावि वालुवुनय।
दकु दिथ छुय करान खार॥
रामु नावय ओत सार॥०॥

बुजुरुक सामानय,
छुय बनावुन च़े पानुय,

रामु नावुक कर व्यचार॥
रामु नावय आत सार॥०॥

सुबु शाम राम स्वरुन,
नेयशकाम काम कर्म करुन।
जन्मु सेंदि लबख तार॥
रामु नावय ओत सार॥०॥

नयथ कॅय असि बदकार,
रचुरस चॉन्य असि लार।
जॉन्य जॉन्य लोग असि फियार॥
रामु नावय ओत सार॥०॥

व्वन्य् गव द्विन्थिथ पान,
मनु रूद कुत्य अरमान।
श्री राम यीनय चें आर॥
रामु नावय ओत सार॥०॥

‘माधव’ क्रेख चु लायुस,
ध्यवव बोज़ि कुनि समयस।
अपिज़्यथ छुय करान कार॥
रामु नावय ओत सार॥०॥

गजल - 1

बे आर यारन जॉज म्याँन्य तन तय,
 वॅन्य तोस यी ना आर।
 हन हन जॉजनम तसुंदि मॉर्य फतन तय॥
 वॅन्य तोस यी ना आर॥०॥

पनु पनु बु कौरनस अँशकु तापन तय,
 मरु मा मटि छुस बार।
 बु यारु मोरुस तसुंद्य सुरतन तय॥
 वॅन्य तोस यी ना आर॥०॥

मारु मॅत्य् मोरुस चाँन्य हुसनन तय,
 आरु रॅस्य्ति दीदार हाव।
 गोसु क्याह चें रोटथम कोनु बोज़न तय॥
 वॅन्य तोस यी ना आर॥०॥

सरि राह त्रौवनस मंज़ मारकन तय,
 क्याह करु लुख मै गेलान।
 लछिनावि कन थाव लोलु नादन तय॥
 वॅन्य तोस यी ना आर॥०॥

ज़रु ज़रु थोवनम छुम ना बोज़न तय,
 हनि हनि गोंडनम अँश्कु नार।
 लोलु नार ल्वलि ह्यथ छुस ललुवन तय॥
 वँन्य तोस यी ना आर॥०॥

ज़ार मै कँर्यमस सुबु शामन तय,
 बरतल छुस बु प्रारान।
 सर बो त्रावस तल पादन तय॥
 वँन्य तोस यी ना आर॥०॥

ज़ालु बो लोगनस तसुंद्य लोलन तय,
 वनुनस थोवनम नु वार।
 श्रावण शीन ज़न गँजिस हन हन तय॥
 वँन्य तोस यी ना आर॥०॥

सथ छम तसुंज़ुय क्यथु त्रावन तय,
 कौरमुत वादु यकरार।
 बेवफा लौगनम क्यथु त्रावन तय॥
 वँन्य तोस यी ना आर॥०॥

‘दास मज़लूम’ छुय यारस छारन तय,
 यियस ना दियस दीदार।
 दर मन यारस छुय गारन तय॥
 वँन्य तोस यी ना आर॥०॥

गजल - 2

मस चाव नट्यव तु नार्यव, मो कड हिसाब मै बाकी।
तशानु लब द्वछे मै चावतम, मो कर जवाब साकी।
मस चाव नट्यव तु नार्यव, मो कड हिसाब मै बाकी॥

चेशमव मै प्यालु चावतम, पुर मस खुमार थावतम।
निशि छुस मै दाम चावतम, पुर मस खुमार साकी।
मस चाव नट्यव तु नार्यव, मो कड हिसाब मै बाकी॥

कलुवालु बाँगरान मस, प्रारान बु छुस दरदस।
दीदार गोछुम मै चोन बस, थौद तुल निकाब साकी।
मस चाव नट्यव तु नार्यव, मो कड हिसाब मै बाकी॥

आगुर अथे चै पानस, राह छुम मै पॉन्य पानस।
जॉनिथ सु निशि मै पानस, क्रेंजलि सॉर मुकॉर मै साकी।
मस चाव नट्यव तु नार्यव, मो कड हिसाब मै बाकी॥

दर परदु पान मो थाव, कलि आस मॅ खठ मै रोय हाव।
योद्वय खता मै कर माफ, कलि चानि आस बु साकी।
मस चाव नट्यव तु नार्यव, मो कड हिसाब मै बाकी॥

हावसुय बु आस दर बाग, कोलु सारि बेह तु मंज बाग।
 दावन मसॉ मे व्वन्य लाग, जॉन्य जॉन्य मु च़ल साकी।
 मस चाव नट्यव तु नार्यव, मो कड हिसाब मे बाकी॥

बस छम मे आश चॉनी, करतम मे नज़रि सॉनी।
 रोटनस बु कर्मु लॉनी, फीर्य फीर्य मु अन मे साकी।
 मस चाव नट्यव तु नार्यव, मो कड हिसाब मे बाकी॥

‘मज़लूम दास’ छु इतिज़ारस, वॅन्य ओस दिवान सु यारस।
 लरि पान त्राविहे सु यारस, गोछुस तिय अंजाम साकी।
 मस चाव नट्यव तु नार्यव, मो कड हिसाब मे बाकी॥



The Avant Garde

494, Sector 31, Faridabad - 03 (Haryana)

Ph: 0129-3092654, 011-35389196

email: avantgarde1@indiatimes.com